


淳

熙

稿

二





稿 熙 淳

(二)

撰 著 趙

淳熙稿卷八

五言律詩

別季承

兼旬眠食同。慷慨豁心胸。尙喜斯文在。未憂吾道窮。鵝湖余舊歷。鷺嶺子新逢。四海均同字。休言兩地中。

呈明叔

冷澹清明節。蕭疎斑白翁。不知春事減。但見綠陰重。坐臥書窗裏。陰晴啼鳥中。年齡故爾似。貧病亦應同。

又呈明叔

七十且強半。駸駸數日間。不成悲白髮。猶說愛青山。五斗雖爲累。千篇政不慳。與君同甲子。此事合相關。

別近呈明叔

靖節甘忤俗。子雲空解嘲。紛紛多面友。了了獨心交。四海歎浮梗。三年嗟繫匏。語離無幾日。梅蘂况江郊。

又呈明叔

欲過江天闊。出門如有方。乍聞禽磔磔。還是雨浪浪。放意官曹外。關心藥裹旁。聽渠桃李退。蘭斛政幽香。

呈潘文叔二首

嶽寺分攜後。郵亭邂逅時。鳴鞭萍實驛。分韻木樨詩。契闊書忘素。飄零鬢益絲。我歸寧偶爾。君至忽於斯。寓舍莓苔合。春郊花草香。忽逢寧比料。欲語未能長。大阮爲勿藥。阿連欣對牀。嗟予重多感。有弟各殊方。

呈叔文諸公

村村迎湫水。戶戶蒸爐香。何以救我穡。但知呼彼蒼。儻寬飢欲死。聊聽醒而狂。困極惟思睡。詩來得助涼。和答黎季成送行

自坐還山計。如同去魯情。水風元不斷。山月每同明。試問詩能和。何如酒共傾。吾家近京驛。側耳聽車聲。蕃近有鄙句簡諸公。而廣文先生專以見貺。盛意自不可不答。

居然自驚驥。陋矣說元黃。章貢昔連地。沅湘今一鄉。談端驚絕倒。詩學味尤長。對月他時白。披風此日涼。再和諸公

官故玄尚白。山能青又黃。嬾隅學蠻詠。款乃和漁鄉。世用有公等。我才無日長。盍簪休閒闕。回首易悲涼。簡黃子耕

不見吾叔度。侵尋將六年。林間迂子步。江上望余船。會合信不易。往來成屢愆。孤山梅未老。曷日訪三賢。簡李伯仁節甫

溧水忽再到。清明無隔晨。一翁方上府。二季曲留賓。詩律歎仍舊。鬢霜驚漸新。君家真李杜。我乃愧黃陳。

簡彥博

憶昨連郭住，猶爲解榻期。古書相是正，餘事劇娛嬉。近者閒何闊，懷哉我所思。如聞穫稻畢，當是入山時。

簡元衡

鳩喚林深擁，蛙鳴草亂科。羣生爲疵癘，首夏失清和。謝病游故倦，尊天問可何。政須聞妙語，一爲洗煩疴。

再簡元衡

積雨朝收礎，清陰晝滿亭。驟乾無雨候，忽動有風輕。藥裏長羸疾，茶甌暫一醒。故人纔咫尺，願見兀如局。

簡伯玉昆仲

雨勢忽已過，雲峯空復生。公能蘇暑病，未足慰農情。同社推詩好，今宵况月明。三人非對影，難弟與難兄。

遠父往富沙兼簡馬莊父二首

徐郎旣吳越，王子又甌閩。孰與還仍往，惟餘病與貧。尙寒花有信，欲盡雨催春。子去寧關抱，余留獨損神。子過鉛山縣，知名有尉曹。談端抽繭紆，文力壯波濤。見子心應識，思渠首屢搔。共爲徐庶友，而獨不能高。

遠父、莊父、皆斯遠交遊，而余獨姚姚。

念欲春遊春旣暮矣而在伯微恙不近杯勺作小詩代簡便呈沅陵何鄧二尉曹

屢有一杯約，况今三月來。屬君繙藥裏，而我欠詩材。楚塞稀紅藥，僧坊賸綠苔。幾時能出郭，分韻與徘徊。

簡王進之

曉枕聞簷溜，閒筇立寺門。
宿醒連卯酒，幽趣落無言。
山色丹青濕，梅花璧玉溫。
誰能此乘興，風味昔人存。

簡徐季益二首

野寺鐘鳴後，溪橋雨合時。
杖藜能過我，酌酒更論詩。
意作恩恩別，仍慙得得期。
近知疏問訊，不那費懷思。
好士今誰是，憐才亦漫云。
詎須隨進士，直擬慕徵君。
確論終當有，浮言斷莫聞。
兒曹與餘子，錄錄更紛紛。

簡王元宗

相望兩招提，林深路不迷。
微軀敢高臥，借屋且幽棲。
問訊聊題句，經過阻杖藜。
良由日日雨，山逕亦成泥。

簡斯遠

已辦入城府，尙留緣雨陰。
相期著屐過，空想掉頭吟。
子故因貧出，余寧歎老侵。
鷗鷺滿臺閣，麋鹿自山林。

簡文顯

敬問周夫子，端居又半春。
初無酒作祟，合有句如神。
桃李已陳迹，谿山同故人。
何能過茅宇，談笑奉清真。

簡全真

方喧思獨坐，當靜想清言。
我埽庭前樹，君憑江上軒。
有詩煩共賦，無酒與重論。
既乏公田秫，仍孤老瓦盆。

過周文顯所居

不謂於茲世。而能有若人。藤蘿爲遮屋。圖史漫娛身。安邑誰爲令。黔婁自守貧。他時獨行傳。端可並麒麟。喜見周司法。和詩有贈。仍用元韻。

路絕嶺梅贈。江搖沅蒨春。敢云傾蓋故。喜甚誦詩新。刀筆非吾事。文章可致身。江陵法曹掾。寧久滯斯人。至日與明叔逸遠。及明叔之子涼孫飲。

至日還爲客。窮愁亦去年。陰陽自升伏。老壯只推遷。易險安常度。响濡無妄憐。兒能壽翁酒。不必問愚賢。過介庵舊宅。

悠悠西州路。慘慘日暮雲。天不慙此老。世孰張吾軍。成都揚雄宅。青山太白墳。可憐車馬迹。不如鷗鷺羣。連日與邢伯言兄弟飲。成四十字。

江上風雖橫。林間月自新。探囊看墨妙。酌酒話情親。感歎思前日。飄零媿此身。未妨頻夕醉。初不污車茵。雨中與公擇對飲。大醉既醒作此。

身世一飄搖。羈愁兩寂寥。怨歌空耿耿。晚雨况蕭蕭。飲強真能醉。詩成或當謠。明朝對青鏡。鬢恐十分凋。與伯玉、元衡、大聲兄弟飲。

何方應雨落。此地祇涼生。杯酒偶相屬。晤言聊敘情。登樓念王粲。促席想淵明。鄉里無新故。情親總弟兄。劉萬二弟置酒。與八九兄同飲。

每憶疏詩卷。何期共酒尊。高棲子若雪。孤宦我湘沅。暮夜風仍吼。途窮志自存。悠悠幾山嶽。泛泛一乾坤。
自荻浦過絕湖三首

二月風濤壯。扁舟性命輕。白頭高浪接。青眼遠山橫。客子空懷怖。漁家自樂生。須渠一杯酒。助我五言城。
遠浪已搖目。疾風仍打頭。翻翻仰飛鳥。矯捷羨輕鷗。湖有萬頃白。舟纔一葉浮。意行從泛泛。吾道本悠悠。
倚賴尊中酒。枝梧卷裏詩。貧嗟居不易。境對語成危。往日行猶記。衝風去不疑。舟師笑相謂。未有若人癡。
三月八日發舟後作

沙步行初改。津亭望且遙。青山出圖畫。白鷺立風標。境熟詩難就。愁深酒易消。雲歸還漠漠。雨靜復瀟瀟。
寄建寧韓尙書二首

今代韓夫子。頻年刺兩州。官崇古常伯。地重漢諸侯。父老記茂宰。山川皆昔遊。懸知里閭化。不待教條修。
宰席猶虛位。尙書合賜環。進賢同拔茹。去佞已無山。誥命從天下。延登指日間。斬公爲大廈。我亦會歡顏。
三月。審知以余行有日。置酒于智門寺後竹間小亭。時與者王彥博。審知之姪彥章。余之弟成父。審
知命以尊前失詩流爲韻。分得流字。書以呈之。

林下有高興。眼前無此流。並溪村逕入。背佛野亭投。綠竹依人好。紅蕖取意秋。病多寬酒債。別近耿離憂。
讀東坡和陶詩

食已無餘事。坡詩信手繙。飄零落蠻蠻。收拾重璵璠。未易窮關鍵。纔能味語言。向來陶謝並。今日要重論。

讀王有道詩

校書非隱遯。逢亂偶棲遲。少日治安策。暮年忠義詩。空聞狩岐隴。不見頌涪溪。有墓荒叢棘。無祠奠酒危。

讀林子仁詩

連林泥滑滑。過地草青青。多病愁難卻。春風夢已經。曾過蘄水郡。不見少微星。獨行慙方駕。清詩許乞靈。

王瑤伯玉攜詩見過二首

大熱有如此。涼風安在哉。書憑長日度。客欠好懷開。豹立妨看竹。蟬飛爲掃槐。欣然王氏子。枉步袖詩來。

故國聞江左。名家數建隆。南遊新識內。東里舊鄉中。有句君真癖。無詩我浪窮。更期風月夕。相與課新功。

二十四日一日作十詩季承同之既罷復書四十字呈季承

米盡不憂飢。行行且賦詩。相看一大笑。從謂兩真癡。未用追元白。聊須效陸皮。流傳君不媿。附益我奚爲。

偶作二首

舊箠已成揮。還披御臘衣。乘除固人事。變化亦天機。道路飄零久。形容少壯非。無徒微祿眷。長與故人違。

未仕思從仕。言歸盍賦歸。世方疎直道。身亦墮危機。舊宅存松桂。春山富蕨薇。淵明覺今是。伯玉悟前非。

秉文攜詩見過

餐玉我無術。點金君有方。胡爲仍各瘦。更復問何長。月好橋同步。詩佳袖取將。歸來未成寐。看葉墮危黃。

書管掾所抄張安國詩

天上張公子。詩輕萬戶侯。駕車追熟路。順水放輕舟。化鶴驚何遠。藏山散莫收。可人秋浦掾。著力爲冥搜。

題三徑圖

憶在宜春月。曾看三徑圖。腥羶尙京洛。羈旅久江湖。豈曰有安宅。絕然忘故都。人琴悵俱已。松菊孰充娛。

題舊日所藏陶淵明採菊東籬下悠然見南山畫

未必形模似。良由意象高。見山非得得。遇酒輒陶陶。蕪沒念三逕。飄零悲二毛。南征儻亡恙。歸老舊蓬蒿。

寄呈壽岡先生二首

竹戶與松窗。當年拜老龐。鬢毛霜自滿。文力鼎猶扛。我句何堪讀。公詩舊所降。寧聞曹與鄣。可並楚三江。我愛清江郡。端如屋上烏。挂冠推二老。逢掖盛諸儒。吳蜀書難得。謂陳擇之書荆蠻病益癯。飛黃去騰踏。局趣效轅駒。

二詩敬寄致政大夫先生

每見清江使。常詢向子平。徐行爲山健。老眼對書明。世共尊耆舊。愚猶及老成。誰人要半道。願與一門生。不向鄉林去。于今又四年。琴書故閒止。草木想蒼然。安否音書曠。飄零日月遷。禮加如下榻。興盡敢回船。

投介庵先生并寄廬陵周侍郎四首

忽憶滄州去。何心漢節持。上書期得請。勇退復奚疑。用舍非吾事。榮枯自彼時。疾風勁草見。松柏歲寒知。二卿辭郡日。刺史乞身年。往事甌已墮。歸來璧顧全。坐令頽俗振。未覺古人賢。白鷺思高舉。琵琶有直絃。
白鷺洲在廬陵
琵琶洲在餘干

桐鄉曾作令。使者復乘車。風俗因子厚。溪山要我居。此聲聞舊矣。今日見歸歟。祇恐功名事。毋庸遽舍諸。粗識詩中趣。翻憐筆下難。中流疑失楫。遠舉慮摧翰。起我七十病。靳公九轉丹。韓豪非所敢。曾未到郊寒。周愚鄉以二蘇先生。李公擇。黃魯直。秦少游。真迹見示。敬賦四十字。

蘇李是吾師。黃秦實嗣之。愛其吟可老。得自買傾資。有本皆如是。斯文不在茲。因知迺翁意。遺子以鐵基。文叔見餞于郊外。且有所論。復賦此。

已辱臨岐送。還能喚酒來。臨行雖倥偬。數刻爲徘徊。出處皆漫爾。古今寧異哉。滔滔勿渠歎。落落自余哀。蕃艤舟湘西之明夕。鄭仲理。吳德夫。季伯壽。黎季成。共置酒于書院閣下。追餞者邢廣聲。王衡甫。時戊申仲秋七日。

已別還重送。情親獨數君。贈詩難卒和。別酒易成醺。渺渺江山恨。飄飄鴻雁羣。不忘相博約。未可問知聞。趨上饒道中

風雨催梅子，溪山進客舟。登臨雖慰眼，悵望復增愁。歲日常爲旅，飢寒不自謀。翩翩羨林鳥，閑逸愧沙鷗。

周愚卿、魯卿、卓卿、同丁永年、陳明叔見餞于去城之十里致嚴堂。經夕乃別。

林表楓能赤，崖邊菊許長。別情俱慘澹，風日倍荒涼。豈爲鍾情極，端由取友良。頽然醒難意，初不累杯觴。

李叔器、方養源、叔器之姪填載酒餞余於思敬亭。

倦客理舟楫，高情攜酒肴。有亭當水滢，共步轉江皋。我已乘流去，渠猶佇立勞。風前醉難倚，月照首頻搔。

新漕道中

夜雨響屋瓦，曙煙遮樹林。田行疑倍滑，水度覺知深。顧望勞雙目，顛躋怖此心。垂堂不知戒，家故乏千金。

宿分水

夜枕疑爲雨，曉檐還見星。驟聞成撼撼，熟聽乃泠泠。信矣無不下，況於高建瓴。此行非絕遠，楚粵自相因。

舟行

下水復上水，暮秋仍早秋。暫歸非去吏，觸緒苦添愁。本乏風雅作，謾于山水遊。經營欲終日，人謂我何求。

湖中

歲晚仍湖路，客中還病身。似聞今大熟，那故獨長貧。方朔一囊粟，季鷹千里尊。扁舟固高蹈，金馬亦沈淪。

舟中讀子進昆仲西遊集有懷其人作詩寄之并示成父弟二首

君是三珠樹，予非兩玉人。水南留步武，竹隱記風神。往者兄同弟，今焉越與秦。細哦詩語妙，如款笑談真。文士今固有，未聞居一門。松筠無異操，蘭蕙若同根。試問臨風讀，何如把酒論。茲行羨吾弟，弭轍向湖村。
成父欲訪子進昆仲於黃壩，故云。

聞晦庵罷宜春留南昌亟往見之將至貴溪逆風大作

「水放輕舸，真期快意遭。那知吾道蹇，還值逆風颺。空闊初憑棹，淵洄竟倚篙。三山信非遠，弱水謾增勞。」
發章泉夜宿永豐約斯遠同謁晦翁先生

比夕皆佳月，幾年無此期。親朋方戰蟻，而我自驅羸。夜作銀河隔，明當玉樹窺。猶須發高詠，予以慰長思。

蚤發

水落灘鳴急，山高霧散遲。夜愁餘響遞，晨幸日光披。頗憶茱萸飲，還思薏苡齋。異鄉逢物色，老病益清羸。

放舟始作

扁舟落吾手，遠役愴余心。道路經過數，秋風日夜深。青林向搖落，白髮益侵尋。況說瀟湘去，仍懷屈賈吟。

發舟快閣下

開船風打頭，舉棹水分流。到處皆成客，今年未識秋。意哀吟蟋蟀，聲若亂鷗鷗。拊枕仍推枕，誰知夢覺憂。

次韻成父舟中

久客日復日。窮冬冰復冰。知還憐倦鳥。側翅恥飢鷹。搔髮傷今老。沿塘記昔曾。舒憂足行卷。教調謝書滕。
初五日晚雨。欲艤舟大琛。而舟行過焉。示成父弟。

一雨晚來涼。山長水又長。尋詩貪嶼島。沽酒誤村場。蕭瑟聽連夕。飄流入異鄉。對眠還晤語。渾憶在山房。
餘干放舟後作詩。以病不飲。故見之詩。

月駛雲俱駛。風恬浪亦恬。渾如畫橫軸。又似鏡開奩。蠻子釣未已。長年行不厭。素羸同李賀。止酒效陶潛。
舟中病思三首

桑葉綠已病。楓林黃亦危。行舟得秋日。滿路入新詩。照水驚非昔。臨風病不支。乾坤一惠施。吾事獨多奇。
已見橫山塔。蘭溪路不多。青銅吾欠此。竹葉奈渠何。貧病成驅役。幽憂復放歌。平生釣臺下。老矣負漁蓑。
日腳陰晴屢。船身坐臥俱。溪山無入望。羈旅孰爲娛。路識長安近。名非短策圖。無迷蔡謨蟹。且覓季鷹鱸。
初到舒州

承平非不久。淮地祇凋疎。負販資它郡。蒿萊塞舊閭。近江猶若此。窮微復何如。可議輕征戰。仍聞急轉輸。
旅食有作

旅食頻年倦。田居樂事遙。春餘桑柘靜。波泛鷺鷥驕。折竹深防筍。撐船滿載苗。新詩隨見寫。舊髮不勝凋。

雨小亦滑道。馬遲元自佳。金章橘弄色。玉面茶吐花。科科初種菜。叢叢未收麻。人生皆有理。吾事獨無涯。籬落未經霜。林園尙吐芳。豆花連豆角。榴朵映榴房。搖落雖茲候。敷榮未爾妨。我懷收柿栗。物色自淒涼。將至鄒子。

湖水冬猶壯。林烟晚更孤。荒涼詩莫狀。零落雁成圖。歷歷舊行路。蕭蕭新鬢鬚。不知造物意。投老又何如。宣風市作。

不誤晨霜白。但驚濃霧黃。過橋初有迹。著木頓生光。未怕寒如許。殊勝雨見妨。燎薪仍酌酒。一笑作烘堂。上龍市早飯。

霧合疑爲雨。雲開復變晴。梨花高朵盛。柳樹弱枝榮。問寺山場遠。逢墟旅飯營。侵晨王事起。亭午野田行。

題柱溪舖

昨日方搖扇。今期可擁裘。頓能驚北客。方覺是南州。歲儻不逢閏。時今寧復秋。無庸歎疎漏。聊得避飈颼。飯楓橋舖。

隻墩復雙墩。晨雞仍午雞。春風空浩浩。客意只淒淒。驅我因微祿。言歸欠薄畦。有懷無與共。聊以命詩題。自荔支舖至楠木舖偶成書楠木。

勿謂他邦陋。深行亦或嘉。林空聞落葉。澗淺度枯槎。麝食能支午。勞歌不致嗟。道邊惟驛舍。山後有人家。

夜過半村李商叟謂不可無所賦爲作唐律二首

舊竹茶山宅。新松南澗墳。聞風與識面。老我及夫君。瘦馬政長路。哀鴻仍暮雲。雖然當努力。無奈復離羣。訪子林間宅。繫余溪上船。還成一夕語。宛似五年前。白髮驚新夢。青燈讀近編。黎明又當別。相對欲忘眠。將至豫章

棹落歸雲底。帆飛夕照間。起予爲白社。極目是西山。蘆雪新鬚鬢。楓丹昔面顏。炊遲飢已慣。酒貴醉能慳。巴邱驛晚題二首

水驛聊容借。官曹少道勞。門關對風雨。策杖波濤。浩浩心疑壯。悠悠首遽搔。忽來雙白鷺。佇立久江皋。戰伐求三國。羈縻自五溪。歸飛慕鴻雁。沿戲狎鳬鷖。酒以忘憂酌。詩因訪古題。是身真老矣。南北更東西。綠蘿道中

人間白馬渡。世外綠蘿山。水駛舟何塞。人危境故閒。傳呼屢落膽。應接一怡顏。更擬桃川路。明朝得意攀。宿野人家

凜若將崩石。狂哉旣倒流。詩危欠好語。日晚覓安投。勞我行何苦。嗟渠戍未休。田居與官籍。俱坐有身憂。宿藍畚寺

嶺斷仍分徑。林紆更著行。畏人嫌俗駕。留客得僧房。脊記年何古。梁題云。景福二年。魏天祐十一年造。吾家句亦香。

寺有趙清獻知虔州赴召時與周茂叔賡唱之刻。茲行經寺五於此獨難忘。

遊浮洲寺

久客渾亡賴羣山得細看身如悟浮沒詩喜助波瀾。塑象觀殊詭作鐘懷叛干。

寺之阿羅漢。清本。鐘乃偽吳武義年。

中所東湖空壯麗芝嶺漫林巒。

宿彭湖寺懷斯遠德過

路仄山崖滑庭中桂樹蒼。驟衝疎雨過徐步晚風長。沽酒尋官道哦詩繞佛廊。曠懷思我友林趣憶支郎。

過石陂少焉至曲睹寺

朝雨自應雨晚晴真是晴。猶經水曲折方得寺紆縈。鳥喚聲何好雲歸迹故輕。青山能見導破衲可無迎。

早飯大明寺因題

晨起渾疑晚山晴尙踏泥。花邊花鴨臥竹裏竹雞啼。問店欣逢寺命車仍杖藜。松篁猶有徑桃李得無蹊。

投宿龍溪寺夜行迷道者久之

已辦龍溪宿寧知鳥路迂。林光收瑣碎山月失須臾。見給雖田父歸尤自老夫。但知尋野寺不擬問官途。

將至信州二首

長年過百艱十步九逢灘。龍湫平澗蓄靈山。列岫寒庖廚朝飯薄絺綌晚衣單。獨抱高深意知音誰爲彈。